

# Factum,

Pour les Religieux Abbé Prieur & Conuent de Sainte Geneuiefue du Mont de Paris, demandeurs.

Contre les PP. Iesuites du College de Clermont, deffendeurs.



Es Religieux de sainte Geneuiefue demandent ausdits Peres Iesuites le payement des lots & ventes, & du droit d'indemnité, à cause de l'acquisition par eux faite du College de Marmoutier, qu'ils ont vny à leur College de Clermont.

La raison de ladite demande est, que lesdits Religieux de sainte Geneuiefue sont Seigneurs censiers dudit College de Marmoutier. Cette qualité est constante, & par consequent le fondement de leur demande ne peut estre contesté.

Les Peres Iesuites se defendent de plusieurs raisons particulieres, en la response desquelles consistent les moyens du iugement du differend des parties.

Ils disent en premier lieu, que le titre auquel le College de Marmoutier leur appartient n'est point vne acquisition, mais que c'est vne vnion ordonnée par Arrest du Conseil du treiziesme may, de l'année 1641. à la charge de payer par eux aux Religieux Benedictins, lors propriétaires dudit College, la somme de quatre-vingts dix mil liures.

La response à ce premier moyen est, que le mot d'vnion dont se seruent lesdits Peres Iesuites est impropre à ce sujet, & ne signifie autre chose qu'acquisition, car l'vnion proprement se fait de deux choses spirituelles ou benefices par suppression du titre de celui qui est vny. C'est pourquoy en Droit Canon les vnions sont odieuses, à cause qu'elles vont à la diminution du seruice de l'Eglise.

Au fait dont est question, il n'y a rien de semblable, l'vnion ordonnée du College de Marmoutier n'est que pour l'augmentation & accroissement du College de Clermont, & par consequent c'est vne acquisition d'une chose temporelle pour l'augmentation & l'accroissement d'une autre. Les vnions de cette qualité sont tres-ordinaires dans les maisons seculieres, les grandes terres ne se forment pas en vn moment, elles se font par succession de temps, & se composent de diuerses acquisitions & membres particuliers, lesquels s'vnifants & se ioignant les vns les autres, composent la totalité & le corps des terres & seigneuries, or on ne peut pas dire que pour des acquisitions qui se font par forme d'vnion pour l'augmentation des terres, les droits n'en soient pas deus aux Seigneurs.

Pour sçauoir si c'est à titre d'acquisition que lesdits Peres Iesuites possèdent à present le College de Marmoutier, il faut sçauoir s'ils en estoient propriétaires, & s'ils le possedoient auparavant l'Arrest du Conseil, car s'ils n'en estoient pas propriétaires & possesseurs auparavant l'Arrest, comme cela est constant, ils sont nouveaux possesseurs, & par consequent ils sont acquereurs, d'autant qu'il n'y a point de titre singulier, soit donations, eschanges, contrats de vente, ou autres, qui ne soient acquisitions, il n'y a que le titre vniuersel, qui est la succession qui a sa denomination particuliere; C'est pourquoy les droits en sont differens par nostre Coustume.

Quand ce seroit mesme vne vnion veritable d'un benefice à vn autre, avec suppression de titre, qui est la partie essentielle de l'vnion, les droits n'en seroient pas moins deus au Seigneur.

Par exemple, si au benefice vny il y auoit vn temporel composé ou de fiefs ou de rotures, à l'esgard du fief, le reuenu de l'année en seroit deub au Seigneur dominant, & à l'esgard des censues, les lots & ventes, ou l'indemnité, & pour l'assurance des mutations des choses feodales, il faudroit bailler homme viuant & mourant.

Car il n'y a point de mutation de quelque qualité qu'elle soit, en matiere de fiefs, qui ne produisent les droits aux Seigneurs, sans aucune distinction de la qualité des personnes, en faueur desquelles se font lesdites mutations, si c'est par succession en directe, il est deu au Seigneur la bouche & les mains, si à titre de vente, il est deub quints & requints, si par succession collaterale, par donation, eschange ou quelque titre que ce soit, le reuenu de l'année que l'on appelle rachapt luy est pareillement deub, il y a mesme des Coustumes qui doiuent le rachapt à toutes mutations.





Il en est de mesme en ce qui est des censives, aux cas esquels les droicts sont deubs. En cas de ventes, les lots & ventes sont deubs au Seigneur, en cas de donation successiou d'eschange, il ne luy est rien deub par les personnes seculieres, il faut attendre d'autres mutations, mais si c'est vne personne Ecclesiastique qui acquiert à quelque titre que ce soit, il doit indemnité au Seigneur, à cause que pendant que la chose est entre ses mains, il se fait cessation de toutes mutations.

Il reste donc de sçauoir à quels titres les Peres Iesuites ont acquis le College de Marmoutier. Or il est certain que c'est à prix d'argent, & par consequent vne véritable acquisition, puis que par l'Arrest ils sont obligez de payer la somme de quatre-vingts dix mil liures car si c'estoit vnion d'une chose Ecclesiastique & spirituelle, il y auroit symonie.

Les Peres Iesuites disent pour seconde raison, que le College de Marmoutier par eux acquis, estoit en main morte, puis qu'il appartenoit aux Religieux Benedictins, que retombant dans leur main & leur domaine, par le moyen de l'Arrest, il passe en vne autre main morte, consequemment que les Religieux de sainte Genevieve sont sans interets, & ne peuuent pretendre aucun droict, parce que lors que le College de Marmoutier a passé dans le domaine des Religieux Benedictins, il faut qu'ils ayent esté satisfaits de leur indemnité.

Cette proposition blesse toutes les maximes des Arrests, & est contraire à la raison fondamentale des fiefs, & des censives. Tous les Arrests dont il y en a grand nombre rapportez par Bacquet Chapitre 36. nombre 4. & 5. par Maître René Chopin & les autres, les Religieux de sainte Genevieve mesme en ont produit d'eux l'un du sixiesme Avril 1565. rendu en leur faueur contre lesdits Peres Iesuites pour l'indemnité de l'acquisition par échange de l'Hostel de Langres, à present vny audit College de Clermont, l'autre du deuxiesme Aoust 1633. pour le Prieur de S. Estienne de Chartres contre les Religieux Minimes de la mesme ville, rendu en cas tout semblable à celuy dont est question, ont iugé que le droict d'indemnité est personnel, & ne profite qu'à ceux qui l'ont payé, en telle sorte que si les gens de main-morte mettent hors de leurs mains les heritages, pour raison desquels ils ont payé l'indemnité, les choses reprennent leur premiere nature, si les acquereurs sont personnes seculieres faut qu'ils payent les lots & ventes, & que lesdits droits soient continués à toutes mutations, si les acquereurs sont personnes en Communauté Ecclesiastiques il faut qu'ils payent l'indemnité, ou qu'il les mettent hors de leurs mains.

La raison de cela est prompte. L'indemnité est vne conuention qui se fait entre le Seigneur & les gens de main-morte qui ont acquis; or vne conuention n'a iamais d'effet qu'à l'esgard des personnes entre lesquelles elle a esté faite, & ne peut iamais profiter à vn autre.

L'autre raison est, qu'encore que les gens de main-morte ayent acquis, il ne s'ensuit pas qu'ils ne puissent auoir des alienations; car les biens d'Eglise ne sont pas absolument inalienables: Au contraire ils se peuuent aliener, mais les alienations en sont plus rares & plus difficiles, à cause des solemnitez Canoniques qu'il y faut apporter. C'est pourquoy l'indemnité n'est autre chose que le prix des mutations qui arriueront pendant le temps que les gens de main-morte se conseruent la possession des choses par eux acquises; mais dez le moment qu'ils les mettent hors de leurs mains, l'effet de la conuention cesse, & les Seigneurs reprennent le droit qu'ils auoient sur les heritages de quelque nature qu'ils soient.

Il a esté dit cy-dessus que la proposition des Peres Iesuites fait violence à la raison fondamentale des fiefs & des censives, d'autant qu'il ne se fait iamais de mutation, qu'il ne soit deu quelque reconnoissance au Seigneur; si c'est vn fief, il faut que le nouveau vassal fasse les foy & hommage, & paye les droits vtils: si c'est vne censive, il faut que le nouuel acquereur paye la censive, & s'inscriue au papier du Seigneur quand il fait son Terrier, & luy paye les lots & ventes quand son titre est vne acquisition à prix d'argent. Si des gens de main-morte, qui succedent à d'autres, ne payent rien, ils entreroient de fort mauuaise grace dans leur nouuelle acquisition, puis qu'ils ne seroient tenus à aucun adueu ny reconnoissance audit Seigneur.

Lesdits Peres Iesuites disent en troisieme lieu, que par l'arrest du Conseil la somme de quatre-vingts dix mille liures qu'ils sont obligez de payer pour le prix dudit College de Marmoutier, estant destiné pour estre employé en immeubles, mesme ordonné qu'ils seront deposez entre les mains d'un notable Bourgeois, en attendant l'occasion de l'employ, elle est immeuble à cause de la destination; & passant que c'est vne espece d'eschange dudit College avec lesdits deniers, ou plustost que c'est vn échange véritable, pource qu'il faut reputer l'employ, comme s'il auoit esté fait, & comme si les choses qui doiuent estre acquises, auoient esté baillées en échange dudit College.



Premierement il est certain que les droits sont acquis aux Seigneurs par la nature & au mesme instant du contract ou du titre translatif de la propriété : & partant il faut regarder quel est le titre qui defere aux Peres Iesuites la propriété du College dont est question. Or personne ne peut douter que ce ne soit vne acquisition à prix d'argent, puisque de la part des Religieux Benedictins, ils transferent ausdits Peres Iesuites la propriété dudit College, & lesdits Peres Iesuites de leur part fournissent pour la valeur dudit College, la somme de quatre-vingts dix mil liures.

Quand vn contract est fait, il est indifferent au Seigneur que les deniers appartiennent purement & simplement au vendeur, ou qu'il soit destiné en employ, il suffit qu'il y a vn prix lequel marque la qualité du contract, & donne par consequent ouuerture aux droits seigneuriaux.

La distinction de l'employ ordonné par l'arrest du Conseil, est pour l'assurance des peres Iesuites acquereurs, à cause que le College qu'ils acquierent, est vn bien de Communauté; mais cela n'empesche pas que le droit ne soit deu aux Seigneurs, autrement il ne leur seroit iamais deu aucuns droits pour les acquisitions qui se font des personnes Ecclesiastiques, pource que les acquereurs ont tousiours ce soin non seulement de stipuler l'employ de leurs deniers, mais mesme d'en faire actuellement l'employ, pource qu'autrement leurs acquisitions ne seroient iamais assurees, mais tout ce qui se fait pour l'execution du contract, est indifferent au Seigneur, pource que cela regarde l'interest des parties, & depend de leurs volonte, dans lesquelles ils peuuent varier: à l'égard du Seigneur on considere purement & simplement le titre du contract, pour sçauoir s'il est de la nature de ceux par lesquels les droits leur sont acquis. Or il a esté monstre cy-dessus que le titre des peres Iesuites est vne acquisition à prix d'argent, puisque l'arrest leur transfere la propriété du College, & les oblige au payement de la somme de quatre-vingts dix mille liures: consequemment les lots & ventes & indemnitez en sont deus aux Religieux de sainte Geneuieue.

Il y a encore moins d'apparence de dire que c'est vn Contract d'eschange, pourcequ'il faudroit qu'au moment que lesdits Peres Iesuites ont receu des Religieux Benedictins la propriété dudit College de Marmoutier, ils eussent transferé ausdits Religieux à titre de contreschange la propriété d'un autre immeuble, afin qu'il y eut subrogation d'un immeuble au lieu d'un autre, or cela n'a pas esté fait, les Peres Iesuites n'ont transporté aucun immeuble aux Religieux Benedictins, ils n'y sont pas mesme obligez par l'Arrest du Conseil, ils sont seulement obligez à deposer la somme de quatre-vingt dix mil liures, il depend puis apres de la volonté des Religieux Benedictins, d'employer ladite somme en immeubles, ou de se contenter de l'interest, & partant il n'y a point d'apparence de dire que l'Arrest ait aucun rapport avec vn Contract d'eschange.

Les Peres Iesuites n'ont pas mesme executé l'Arrest, au contraire au lieu de fournir la somme de quatre-vingt dix mil liures en deniers, ils ont passé Contract de constitution de quatre-mille cinq cents liures de rente, laquelle ils ont promis de continuer iusqu'au iour du remboursement, c'est donc vne rente rachetable. Or par nostre coustume les lots & vente ou les quints & requints sont aussi bien deus au Seigneur, pour les immeubles, bailles à rente rachetable comme pour les Contracts purs & simples.

Il se void dans le procez que les Peres Iesuites ont proposé diuerses autres raisons, il suffit de les représenter pour les refuter, ils disent qu'il n'est point deu lots & ventes ny de droit Seigneuriaux pour les ventes forcées, comme pour la vente des biens Ecclesiastiques faits pour cause de subuention, pour les partages & licitations qui se font entre coheritiers, pour ce qu'ils ont vne cause necessaire.

Premierement l'autorité du Roy ne fait iamais de force n'y de violences, la vraye liberté consiste au contraire en l'obeissance, Or les Arrests du Conseil sont vn des premiers effets de l'autorité Royale, consequamment il ne peut y auoir de force.

En second lieu iamais vn acquereur n'est forcé n'y necessité d'acquérir, la force & la necessité sont tousiours de la part des vendeurs, or les Peres Iesuites sont acquereurs consequamment c'est vn acte tout libre & tout volontaire de leur part, c'est vne force bien douce & vne necessité bien-heureuse de receuoir du bien, or on ne peut pas douter que les PP. Iesuites ne recoiuent de l'aduantage de l'Arrest du Conseil, puisqu'il augmente leur College de Clermont, en y ioignant ce luy de Marmoutier consequemment ils ont tousiours suiet de se louer de la force qui leur procure ledit aduantage.



Qui doute que le merite & l'estime des Peres Iesuites ne leur ait fait obtenir de la bonne grace du Roy l'Arrest du Conseil, pour obliger les Religieux Benedictins de les accommoder de leur College de Marmoustier ? s'il y auoit de la force ou de la necessité elle auroit esté soufferte par lesdits Religieux, mais l'obeyssance & soubmission dont ils font profession fait qu'ils honnorent & recoiuent avec reuerence tout ce qui vient de la part de nos Rois.

Les alienations pour la subuention & les partages & diuisions des familles sont des exemples fort impropres, & appliquez hors de leur suiet, la subuention estoit vne loy de l'estat vn secours dans la necessité publique, à laquelle il faut que l'interest des particuliers cede puisqu'il y va de leur conseruation, & encore les droicts en eussent esté deus aux Seigneurs si les acquerieurs n'en eussent esté exempts par clause & disposition expresse de l'Edict.

Le partage & les licitations sont mutations de personnes puisque les heritiers representent ceux auxquels ils ont succédé, ce sont accommodemens de bien-seance & d'amitié dans des familles qui importent au repos public, voila pourquoy les Seigneurs auroient mauuaise grace de pretendre aucun droict.

Lesdits Peres Iesuites proposent vne raison particuliere en ce qui est des lots & ventes. Ils disent qu'ils appartoient au defunt Monseigneur le Cardinal de la Roche-foucaud, qui leur a fait cet honneur de les nommer ses legataires vniuersels, par consequent que le droict est confus en leur personnes, qu'encore que depuis ce temps ils ayent cédé leur leg vniuersel ausdits Religieux de sainte Geneuiefue, cette cession n'a pas peu faire reuiure contr'eux l'action desdits lots & ventes, pource qu'on ne presume pas que quand ils ont fait ladite cession leur intention ayt esté de faire reuiure vne action contr'eux mesmes n'y que l'intention desdits Religieux de sainte Geneuiefue qui estoient gratifiez par le moyen de ladite cession ayent eu la pensée d'acquiescer ladite action.

Or c'est en cela qu'ils se trompent car la moytie des lots & ventes appartiennent audits Religieux de sainte Geneuiefue, partant ledit sieur Cardinal n'a peu disposer que de l'autre moytie qui luy appartoient. En second lieu defunt monsieur le Cardinal de la Roche Foucaud a fait deux legataires vniuersels par son testament à sçauoir les PP. Iesuites & les Incurables auxquels par consequent la moytie afferente audit seigneur a appartenu esgalement partant lesdits Peres Iesuites ne pouuoient pretendre confusion en leurs personnes en qualiré de legataires que d'un quart desdits lots & ventes puisque l'autre quart appartient audits Incurables & appartient à present audits Religieux de sainte Geneuiefue comme ayans acquis leurs droicts. A l'égard du quart qui appartient audits Peres Iesuites il est certain pendant que la qualiré de legataires vniuersels a subsisté en leurs personnes il y a eu confusion dudit quart mais ayans cédé leurs legs vniuersels audits Religieux de sainte Geneuiefue, & ayans receu le prix, l'action qui estoit contr'eux pour le payement dudit quart reprend sa force & entre au mesme estat qu'il estoit auparauant ledit leg vniuersel.

Cela est décidé formellement en loy. ff. de *hered. tex. act. ven.* en laquelle si vn heritier qui estoit debteur enuers la succession, & duquel la debte estoit par consequent confuse en sa personne vient à vendre son droict successif, toutes les debtes qui estoient esteintes par la confusion reuiuent, & reprennent leur vigueur contre luy comme si iamais il n'auoit esté heritier, il en est de mesme du legataire vniuersel puis qu'il tient lieu d'heritier parmy nous, de l'heritier chargé de restitution & des autres.

L'on ne peut dire que ce soit vne subtilité de droict au contraire c'est vne raison d'equité parce que le droict actif & passif font parties de la succession ou du leg vniuersel par consequent passe dans la cession & en font partie, au cas contraire si l'heritier ou legataire vniuersel est creancier de la succession, ce qui luy estoit deu est confus en sa personne, mais s'il cede son droict successif ou son droict vniuersel il devient creancier comme auparauant.

Il doit donc demeurer pour constant que les PP. Iesuites estant acquerreurs d'un immeuble en la censue des Religieux de sainte Geneuiefue ils ne peuvent avec iustice denier le droict de lots & ventes & l'indemnité.

**Messieurs LE GRAS & BOUCHERARD Rapporteurs.**

*Les sous signez qui ont veu le Factum cy-dessus sont d'avis que lesdits Religieux de sainte Geneuiefue sont tres-bien fondez à demander ausdits Pp. Iesuites les droicts de lots & ventes & d'indemnité du College de Marmoustier pour les raisons contenues audit Factum, estant vne des maximes des plus communes du Parlement que l'indemnité est personnelle, & ne sert qu'à ceux qui l'ont payé, l'Arrest du Conseil ne peut rien changer à la question, pource que l'union, ordonnée par iceluy est en effet vne acquisition à prix d'argent au profit desdits PP. Iesuites.*

Deliberé à Paris le 17. Fevrier 1647.

Signé,

Fremin,

Bataille,

Chapelier,

Bourdin,